



Årsmelding Eid kyrkjelege fellesråd 2013

1. Innleiing

Året 2013 har vore eit spesielt arbeidsår. Restaureringsarbeidet på kortaket i Eid kyrkje har vore det største prosjektet dette året – og dette har også lagt beslag på nesten heile ramma av investeringsmidlar for 2013. Likevel har det lukkast å finne naudsynte midlar til innkjøp av nye salmebøker som vart tekne i bruk 1. søndag i advent. Elles har det vore store utskiftingar i staben med både ny sokneprest og ny ungdomsprest.

2. Fellesråd og tilsette

2.1 Fellesrådet

Fellesrådet er samansett slik:

Frå Eid sokn:

Oddvar Os – leiar
Sigrunn Heggen Leivdal – nestleiar
Vara:
Per Oos
Bjørg Melheim

Frå Stårheim sokn:

Håvard Orheim
Olaug Vedvik
Vara:
Jostein Hanebrekke
Reidun Borgstrand

Frå Kjølsdalen sokn:

Sonja Hatlenes
Vidar Hatlegjerde
Vara:
Lars Frode Humborstad
Janne Midthjell

Kommunal representant:

Lars Svein Drabløs
Vara:
Magne Øyra

Geistleg representant:

Prost Rolf Schanke Eikum
Vara:
Sokneprest Kristin Stensrød (til 15. august)

Sokneprest Carsten Mrusek (frå 15. august)

Fellesrådet har hatt 4 møte og handsama 28 saker i 2013.

2.1.1 Underutval i fellesrådet

Fellesrådet har hatt følgjande underutval:

➤ Kyrkjeleg administrasjonsutval (partsamansett utval)

Fellesrådet sine representantar : Oddvar Os - leiar, Sigrunn Heggen Leivdal – nestleiar, Sonja Hatlenes, vara Håvard Orheim. Tilsette sine representantar: Wenche Noste, vara Finn Arve Sundal.

Administrasjonsutvalet har ikkje hatt møte i 2013.

➤ Forhandlingsutval/tingingsutval ;

Medlemmer: Sigrunn Heggen Leivdal - leiar, Oddvar Os, vara Olaug Vedvik.

Utvalet har ikkje hatt møte i 2013.

Kyrkjevevja er sekretær for administrasjonsutvalet og forhandlingsutvalet/tingingsutvalet

.

2.2 Tilsette

Kyrkjevevje/dagleg leiar	Kristen Hundeide	100%
Ungdomsarbeidar	Oline Myklebust	100% (til 30. juni)
Organist II	Ingvard Sundal	20%
Sekretær	Wenche Noste Cecilie Vestbøstad Marta Jenny Elvebakke	50% (til 27. august) 50% frå 1. september (permisjon) vikar frå 12. august
Ungdomsprest	Kaare Michael Christoffersen	100% (frå 19. august)
Arbeidsleiar kyrkjegard	Finn Arve Sundal	100%
Kantor	Ralph Cupper	100%
Musikalsk barne- og ungdomsarb.	Asbjørn Eikenæs	20%
Kateket	Beate Folkestad Osdal	20% + timar (frå 1. september)
Trusopplærar	Solveig Orheim Nome	60% (sjukmeld frå 18. mars)
Kyrkjetenar	Björg Risøy	80%
Kyrkjetenar	Knut Hans Røed	7,1 %
Kyrkjetenar	Per Hagen	11%
Kyrkjetenar	Randi Heggheim	15%

Ingvard Sundal er tilsett i stillinga som Organist II. Asbjørn Eikenæs har vore vikar for organist i feriar og ved sjukdom.

Sekretæren ved kyrkjekontoret har utført deler av sekretærtjenesta for prost.

Protestillinga har fast arbeidsplass på Eid kyrkjekontor. Prosten har færre gudstenester i Eid, og reiser meir i heile prostiet. Seniorpresten vert brukt i Eid og er med i Kjølisdalen sokneråd som sokneprest i Kjølisdalen.

Etter over 32 år i trufast teneste som kontormedarbeidar slutta Wenche Noste 27. august etter oppnådd pensjonsalder. Vi skuldar alle Wenche stor takk for innsatsen gjennom alle desse

åra!

Cecilie Westbøstad vart tilsett i stillinga som kontormedarbeidar frå 1. september. Det første året er Cecilie ute i svangerskapspermisjon – og Marta Jenny Elvebakke vart tilsett i vikariatet. For å kome inn i arbeidet vart Marta tilsett frå 12. august slik at ho kunne «overlappe» nokre dagar saman med Wenche.

Marius Økland har vore leigd inn frå Acta i 20 % stilling fram til sommaren 2013 og var saman med sokneprest Kristin og Oline Myklebust konfirmantlærer for kullet som vart konfirmerte våren 2013. Frå sommaren av var det ikkje lenger mogleg for hverken Oline eller Marius å halde fram med dette arbeidet. Når også sokneprest Kristin slutta etter sommarferien kunne det sjå ut som vi brått stod heilt utan konfirmantlærarar!

Heldigvis gjekk prosessen med å få tilsett ny sokneprest fort – og Carsten Mrusek var på plass i stillinga frå 15. august. Samstundes var vi også så heldige å få tilsett ny ungdomsprest – og Kaare Michael Christoffersen var på plass frå 19. august! I tillegg til desse fekk vi til vår store glede også tilsett kateket Beate Folkestad Osdal i 20% stilling som konfirmantlærer!! Beate har også teke ansvar for trusopplæringsarbeidet på timebasis så lenge Solveig Nome er sjukmeld. Vi ynskjer desse nye medarbeidarane hjarteleg velkomne i staben og ynskjer dei all mogleg glede og signing i arbeidet!

Asbjørn Eikenæs deltek i trusopplæringsarbeidet i 20% stilling som er finansiert av trusopplæringsmidlane. Asbjørn er ein uvurderleg musikalsk ressurs både ved Stårheim Barnekor og ved Babysongen – i tillegg til andre oppgåver der musikalsk medverknad er ønskeleg.

Johannes Nome har teke seg av planting på og stell av gravene som har avtale om gravfond. Han får betalt ein fast sum årleg for kvar grav han steller. Summen er avhengig av 2 alternativ for planting og stell.

Bjørg Risøy har 80% stilling som kyrkjetenar. Ho er kyrkjetenar ved alle kyrkjelege handlingar i Eid kyrkje og fast kyrkjetenar i Stårheim kyrkje ved gravferder, vigslar, o.l. Knut Hans Røed er kyrkjetenar i Stårheim ved vanlege gudstenester. I Kjølsdalen kyrkje er Randi Heggheim kyrkjetenar og Per Hagen er kyrkjetenar i Heggjabygda kyrkje.

2.2.1 Arbeidsmiljø og personalarbeid

Å arbeide for betre samhandling og meir teamkjensle i staben er ei stor utfordring i ein arbeidsstokk med mange deltidstillingar, der arbeidsplassane i tillegg er ulike. I året som har gått har vi lagt mykje vekt på at vi alle skal føle at vi er ein del av ei samla eining – sjølv om staben er samansett av personar med to forskjellige arbeidsgjevarar. Ved hjelp av godt samarbeid frå både prestane og dei tilsette i fellesrådet føler vi at vi har lukkast med dette. Det er svært gledeleg å sjå at dei nyttilsette i 2013 har funne seg godt til rette og vidarefører det gode samarbeidet som føregjengarane hadde. Arbeidsmiljø og samarbeid mellom dei kyrkjeleg tilsette er soleis godt. Dette gjeld også samarbeidet med prestane.

Kvar tysdag føremiddag er det stabsmøte på kyrjekontoret. Der deltek dei som er tilsett i høgast prosent stilling. Organist(vikar) og prostiprest som er tilsette i deltidstillingar, møter ikkje kvar gong.

Eid kyrkjelege fellesråd takkar både prestane og dei fellesrådstilsette for godt og konstruktivt arbeid i 2013.

2.2.2 Likestilling

I likestillingslova § 1a nemnast det at offentlig styresmakt skal arbeide aktivt, målretta og planmessig for likestilling mellom kjønna. Arbeidsgjevar skal arbeide aktivt for dette innafor si verksemd. I offentlig sektor er det krav om å gjere greie for likestillingssituasjonen i verksemda og kva som vert gjort i den samanheng.

Ved utgangen av 2013 var det 14 tilsette i Eid kyrkjelege fellesråd, 6 kvinner og 8 menn. Det er mange deltidstillingar.

Ved avlønning følgjer ein hovudtariffavtala for KA sitt tariffområde - som er kjønnsuavhengig.

3 Prosjekt og faste tiltak

3.1 Oversikt over gjennomførte og planlagde oppgåver i kyrkjene

Eid kyrkje. Arbeidet med restaurering av taket i koret er nærast fullført i 2013. Etter tidsplanen skulle den nye takdekoren monterast på førjulsvinteren 2013. Etter avtale med entreprenøren valde vi å utsetje dette til januar og februar 2014 fordi kyrkja må stengjast i monteringsperioden og vi ville ikkje at dette skulle kome inn i advents- og/eller juletida.

Kantor Ralph Cupper har tidlegare fått utarbeidd ein grundig tilstandsrapport for orgelet i Eid kyrkje, med forslag til tiltak for restaurering. Kostnaden er innarbeidd i økonomiplanen og ein reknar med å starte opp dette arbeidet i løpet av 2014.

Stårheim kyrkje. Stårheim kyrkje feirar 150-års jubileum i 2014. Det er naudsynt å føreta ein del opprusting før jubileumsmarkeringa, m.a. utbetring av råteskader og måling av kyrkja. Dette er planlagt utført på vårparten 2014. I 2013 har ein fått lagt asfalt på gangvegen rundt kyrkja frå aust, samt framfor hovudingangen og rullestolrampen. Kyrkja fekk også på plass flaggstong i 2013. Denne er betalt av gåvemidlar frå Stårheim sokneråd.

Det er også planlagt nødvendig vedlikehald av orgelet i Stårheim kyrkje. Dette er føresett å vere ein del av same prosjektet som restaurering av orgelet i Eid kyrkje.

Heggjabygda kyrkje. Her er det ikkje gode nok toalettforhold og det er ikkje innlagt vatn i kyrkja. Parkeringsforholda er også svært utilfredstillande. Det har vore dialog med grunneigaren om parkeringsareal og fellesrådet har avsett midlar til delvis opparbeiding av dette.

Organisten ynskjer også å få på plass ei lydskjerming mellom spelepulten og orgelpipene slik at den som spelar ikkje vert høyrselsskada.

Kjølisdalen kyrkje. Arbeidet med dåpssakristiet vart fullført i 2013 og dette har blitt eit veldig fint og tenleg rom. Fellesrådet vil takke sanitetskvinnene og bygdefolket ellers i Kjølisdalen for gåver og arbeidsinnsats for å få dette rommet ferdig.

Det er også bygd eit nytt skåp i sakristiet til oppbevaring av messehaklane i kyrkja.

I alle kyrkjene vil det vere tenleg med fjernstyring av varmen. Dette vil då kunne bli styrt frå kyrjekontoret via data. Kostnaden med dette er likevel slik at det førebels ikkje kan prioriterast i "konkurranse" med andre, og heilt nødvendige, prosjekt. Det same er tilfelle med montering av automatiske ringeanlegg i kyrkjene.

3.2 Minikonfirmantarbeid

Denne aktiviteten vert utført av soknepresten saman med ungdomsprest/ungdomsarbeidar, trusopplærar og musikalsk barne- og ungdomsarbeidar.

3.3 Ungdomsarbeidet, nattcafe, ung messe og ungdomskoret On.line

Nattcafeen hadde god oppslutnad også i 2013. Første halvåret var det Oline Myklebust som hadde ansvaret for drifta. Etter at Kaare Michael Christoffersen tok til i stillinga som ungdomsprest er det han som har hatt dette ansvaret. Miljøet på fredagskveldane er godt – og ungdomane stiller sjølve opp for å ta vare på, og verne om, dette miljøet.

Ung Messe hadde tidlegare ein eigen komité under leiing av ungdomspresten. Dei siste åra har dei tre konfirmantlærarane teke ansvar for dette – og det vert no halde Ung Messe ein gong i halvåret. Deltakinga og tilbagemeldingane frå messa har vore svært oppløftande. Kombinasjonen av musikk, forkynning og visuelle verkemiddel når heilt tydeleg fram til ungdomane.

Ungdomskoret On.line har ikkje vore i drift i 2013.

Koret er eit ungdomskor kantor nyttar ved ymse gudstenester. Sjå meir under 3.6. «Kyrkjemusikalsk arbeid»

3.4 Trusopplæring

Trusopplæringsarbeidet i Den Norske Kyrkja er eit stort og omfattande arbeid. Truleg er dette ei av dei største utfordringane Kyrkja har hatt på svært lang tid.

Trusopplæringsarbeidet er finansiert ved årleg tildeling av statlege midlar. Ein føresetnad for dette er at det vert utarbeidd ein langsiktig plan for trusopplæringsarbeidet. I Eid har vi no ein godkjent plan for trusopplæringa i alle sokna våre. Vi har derfor gått frå «planleggingsfasen» til «gjennomføringsfasen». Når alle tiltaka skal setjast ut i livet merkar vi endå sterkare trongen for frivillige hjelparar. Sjølv om både prestane og dei fellesrådstilsette gjer alt dei kan er det ikkje mogleg for oss å rekke over alt. Det er derfor svært viktig for å lukkast med trusopplæringsarbeidet at sokneråda kjenner ansvar for, og tek aktivt del i, både planer og gjennomføring.

Det finst ein eigen nettportal for trusopplæringsarbeidet på www.kyrkja.no under logoen Størst Av Alt. Her kan ein lese om dei ulike tiltaka som er iverksette i heile landet; og her kan ein hente inspirasjon til nye tiltak og utveksle erfaringar. Dette nettverket er svært verdifullt for arbeidet. Fellesrådet nyttar også denne nettportalen til årleg rapportering av tiltak og økonomi. På Kyrkja i Eid sine egne nettsider ligg det ein link direkte til vår “plass” på nettportalen.

3.5 Nettsider for Kyrkja i Eid

Nettsidene våre er til stor glede og nytte i arbeidet. På desse sidene har vi m.a. lagt ut informasjon om kyrkjene våre, om gudstenester og andre kyrkjelege handlingar, om aktivitets-/kulturtilbod i Kyrkja sin regi, om tilsette, medlemmer i sokneråda og fellesrådet. Nettsidene er også eit nyttig reiskap for å få ut informasjon t.d. ved kyrkjeval, jubileum, og liknande. Vi vonar mange nyttar nettsidene våre – og vi tek gjerne imot tilbagemeldingar på endring og/eller forbetring. Nettsidene finn ein på www.eid.kyrkja.no og/eller www.eid.kirken.no

3.6 Kyrkjemusikalsk arbeid

Det er lagt ned mykje tid og krefter i å revitalisere det kyrkjemusikalske arbeidet. Særleg har kantor, Ralph Cupper, arbeidd mykje med dette. Konsertserien "Aftenmusikk" vart gjennomført i februar; men det er etter kvart meir og meir arbeidskrevjande å få inn sponsormidlane som trengst for å kunne engasjere musikarar og songarar. Dette er midlar vi er heilt avhengige av for å kunne halde fram dette gode tiltaket. Det er Eid Sokneråd som har økonomistyringa for "Aftenmusikk". Både soknerådet og fellesrådet har bidrege med midlar til tiltaket. Soknerådet har no nedsett eit eige musikkutval som har hovudansvar for både Aftenmusikk og andre konsertar/tilstellingar i soknerådet sin regi. Kantor driv også orgelklubben for dei som er interesserte i å lære orgelmusikk, og han driv også ungdomskoret «Koret» som m.a. har delteke ved fleire gudstenester.

3.7 Faste tiltak

Dei tilsette arbeider med mange tiltak som går igjen år for år. Ein del tiltak, som t.d. ungdomsarbeid og dåpsopplæring, er no samkøyrte med trusopplæringsarbeidet. Felles for alle tiltaka er at vi har dyktige tilsette som gjer ein stor jobb med små ressursar. Vi er no komne til eit punkt der arbeidsbelastninga på dei tilsette er så stor at vi ikkje kan påta oss å starte nye tiltak utan å få avlastning med eksisterande tiltak – enten ved at andre tek over desse tiltaka eller at dei rett og slett vert avvikla. Meir omtale av dei enkelte tiltaka vil finnast også i årsmeldingane for sokneråda.

3.8 Andre utførte oppgåver

I samband med registrering av feste av gravminne, har ein funne fram til gravminne som ein ynskjer å ivareta, sjølv om festar seier ifrå seg sitt festeansvar. Eid kyrkjelege fellesråd står då som festar.

4 Samarbeid med andre

4.1 Kommunen

Eid kyrkjekontor samarbeider med Eid kommune, særskilt innan løns- og rekneskapsføring, men og i forhold til uteseksjonen i driftsavdelinga. Det er også samarbeid om breiband/data. Det er utarbeidd tenesteytingsavtale med Eid kommune.

4.2 Sokneråda

Ein har prøvd å halde leiarmøte 2 gongar kvart halvår. Her deltek soknerådsleiarane, prost, sokneprest, fellesrådsleiar og kyrkjevevjerje. Møta er nyttige for informasjonsutveksling og for å samkøyre aktivitetar.

5 Økonomi

For 2013 vart det eit rekneskapsmessig meirforbruk (underskot) i driftsrekneskapsen på kr 112.619,42. Det står kr 65.037,41 på disposisjonsfond. Mesteparten av dette kjem frå mindreforbruk (overskot) i 2012. Dette er no det einaste som er ført som disposisjonsfond - og kan nyttast til delvis dekking av underskotet i 2013.

I 2013 fekk vi også endeleg forsikringsoppgjøret etter orkanen «Dagmar» i 2011. Oppgjøret gav full dekning for utgiftene, med unntak av ein liten eigenandel på ca. 8.000, og gav ei inntekt i rekneskapen for 2013 på kr. 88.184,52 som ikkje var budsjettert. Dette kom i tillegg til inntektsførte beløp i 2012-rekneskapen. Resultatet av dette var at midlar som var avsett som «buffer» i påvente av oppgjøret kunne nyttast m.a. til å finansiere nye salmebøker.

På festeavgiftene er det lågare inntekt enn budsjettert i 2013. Etter ”oppdyddinga” i festekontraktene for nokre år sidan fekk fellesrådet inn ein del ”etterslep” som gav eit for positivt bilete av dei årlege inntektene. Det nivået vi ligg på i årets rekneskap er truleg eit meir reelt nivå i eit normalår.

Det står kr 266.785,81 på bundne driftsfond. Av dette utgjer gåver til nytt orgel kr 21.710,00, gåver til lydanlegg kr. 700,00, Nattcup konfirmantar kr 57.967,99, Malawi-prosjektet kr 49.744,72, Eid Diakoniat kr 13.526,60, Nattcafeen Eid kr 16.604,69 og Helgefred kr 106.531,81.

M.a. gjennom konsekvent innlegging av giroar i alle nummer av bladet har ein makta å bygge opp kapitalreserven til kyrkjebladet Helgefred. Bladet har heller ikkje i 2013 annonseinntekter og ein har derfor freista å kutte kostnader ved at sekretæren ved kyrkjekontoret har teke mykje av arbeidet med oppsetting/lay-out av bladet. Det har heller ikkje lukkast å få fast redaktør for bladet og soknerådsleiar i Eid har frivillig og ulønna teke dette ansvaret!

I rekneskapen for 2013 er Nattcafeen og gravfonda førte inn i fellesrådet sitt rekneskap. Det er avsett 1 nytt bunde driftsfond (Nattcafeen), konto 25100094 i balanserekneskapen. Det er viktig å vere merksam på at dette er midlar som er bundne til eit spesielt føremål og som derfor ikkje kan nyttast i fellesrådet si vanlege drift.

Gravfonda er førte på konto 23275100 under kortsiktig gjeld i balanserekneskapen.

Alle tiltak/kontoar som er registrerte på fellesrådet vert reviderte av Kommunerevisjonen i Nordfjord.

På lønnsbudsjettet er det ei innsparing på kr 237.946,25 (lønn – refusjonar frå NAV) for 2013. Samla forbruk av lønnsmidlar er 93,94 % av budsjett. Dette skuldast m.a. at vi ikkje har hatt ungdomsprest tilsett fram til 19. august, samt lågare pensjonsutgifter enn budsjettert. På kyrkjegardane er utgiftene til vikarar vesentleg høgare enn budsjettert. Dette skuldast at kyrkjegardsarbeidar i fast stilling har vore 40% sjukmeld og vi derfor har hatt inne ekstra personell. Meirutgiftene til vikartenesta er delvis dekka inn ved refusjon av sjukepengar frå NAV. Dei budsjetterte utgiftene til sommarvedlikehald på kyrkjegardane har også vore nytta til dette. Det er totalt inntektsført kr 185.927 i refusjonar ved sjukdom og fødselspermisjon i 2013.

Utgiftene for straum er 4% høgare enn budsjett (kr 9.372). For adm./kontor er utgiftene 51,6% høgare enn budsjett medan det for kyrkjene er ein reduksjon på 11,6% i høve til budsjett. For kyrkjegardane er straumforbruket som budsjettert (- kr 144,80) Hovudårsaka til den store auken i straumutgifter på adm./kontor er nok byggeprosessen ved Kyrkjetunet i 2012 og 2013. Dette medførte eit vesentleg høgare forbruk – og utgiftene er fordelt mellom Kyrkjetunet og leigetakar etter avtalt fordelingsnøkkel. Kyrkjetunet har ikkje skilt straum til ombyggingsarbeidet frå straum til vanleg drift. Årsaka til utgiftsreduksjon i kyrkjene er kombinasjonen av låge straumprisar og mild førjulsvinter i 2013.

I investeringsrekneskapen står det til saman kr. 10.382,50 som ikkje er finansiert. Dette kjem frå kjøp av nye salmebøker, som vart noko dyrare enn budsjettert. Dette meirforbruket vert finansiert ved justering av investeringsmidlane for 2014.

Ubrukte investeringmidlar er sett av til ubundne investeringsfond i balanserekneskapen. Det står no til saman kr 1.672.286,87 på ubundne investeringsfond. Dette er investeringsmidlar, t.o.m. 2013, som er budsjettert, men ikkje brukt.

6 Avslutning

2013 vart nok eit år prega av at ein har prøvd å få mest mogleg ut av ressursane ein hadde tilgjengeleg.

Det er svært gledeleg at prosessen med å få tilsett ny sokneprest gjekk så fort som den gjorde. Sameleis at vi endeleg lukkast med å få tilsett ny ungdomsprest, samt å få tilsett ein så dyktig person som konfirmantlærer/trusopplærer.

I trusopplæringa vert det lagt ned ein stor arbeidsinnsats for å utvikle og iverksetje tilbod for alle aldersgrupper. Ved fellessamlingar med andre er det gledeleg å registrere at vi ligg langt framme i dette arbeidet – og både prestane og andre tilsette fortener stor ros for innsats og entusiasme! Også frå bispedømet får Eid ros for arbeidet som vert gjort her.

Gledeleg er det også å sjå at heimesidene våre vert stadig meir nytta av innbyggjarane i sokna våre. Også i 2013 var våre heimesider blant dei mest besøkte i heile bispedømet utanom Bergen. Vi vonar at vi kan makte å utvikle desse web-sidene vidare til felles nytte og glede.

Det mest spanande i 2014 er montering av den nye dekoren i kortaket i Eid kyrkje på nyåret. Det er ekstra gledeleg at vi i skrivande stund kan konstatere at dette arbeidet er utført – og at resultatet er heilt strålende! I løpet av denne prosessen har vi også fått stadfesta at takdekoren i skipet også treng sårt til restaurering. Det vert ei stor utfordring å få tilstrekkeleg finansiering til at dette kan realiserast.

Det største investeringsprosjektet som no må prioriterast er renovering av orgela i Eid og Stårheim kyrkjer i tillegg til å få betra parkeringstilhøva ved Heggjabygda kyrkje og utviding av gravstaden i Kjølisdalen.

Montering av nye lerret og projectorar i kyrkjene slik at vi kan gjere oss nytte av digitale hjelpemiddel vil også bli gjort i løpet av 2014, samt å få sett Stårheim kyrkje i så god stand som mogleg til jubileumsmarkeringa i juni.

Fellesrådet har ein stab samansett av fagleg sterke personar som er effektive og utfører oppgåvene sine på ein god måte. Vi har og ein kommune som er positiv til arbeidet vårt. Eid kyrkjelege fellesråd vil takke spesielt tilsette ved personalavdelinga og økonomiavdelinga i Eid kommune for god hjelp og støtte i 2013.

Med tilvising til det som er nemnt ovanfor kan fellesrådet sjå tilbake på nok eit aktivt år og kan ta fatt i utfordringane som ventar med von om at vi får tilstrekkelege økonomiske rammer til at Kyrkja framleis kan nå ut med gode tenester til folket.

Nordfjordeid, 21.04.2014

Oddvar Os
Leiar Eid kyrkjelege fellesråd

Kristen Hundeide
Kyrkjeverje i Eid